

PROVINCIA ELVSANA, SEV NOVEMPORVLANIA.

ELVSA, seu Ciuitas Elusatum dictæ Notitiæ antiquæ Galliarum, vulgò *Eause*. *Mamertinus* Elusanus Episcopus subscripsit Concilio primo Arelatensi, & *Clarus* ibi dictus Metropoli interfuit Agathensi.

LACTORATIVM dictæ Notitiæ, vulgò *Lectoure*. *Vigilius* eius ciuitatis Episcopus subscripsit Concilio Agathensi, & *Aletius* Aurelianensi quinto.

CONVENARVM Ciuitas Strab. lib. 4. vulgò, *Cominges*. *Suanis* huius Episcopus eidem Concilio Agathensi subscripsit, & *Amelius* Aurelianensi quinto.

CIVITAS CONSORANNORVM dictæ Notitiæ Galliæ sub Honorio, vulgò *Conserans*. *Glicerius* eius Episcopus eidem Concilio Agathensi subscripsit, & *Theodorus* Aurelianensi quinto.

VASATÆ Ammian. Marcellin. libro decimo quinto, vulgò *Basas*. *Sexilius* Vasatensis Episcopus eidem Concilio Agathensi subscripsit, & *Orestes* Matisconensi secundo.

TARBA, Turba dictæ Notitiæ, vbi Castrum Bigorra, vulgò *Tarbes*. *Aper* huius Episcopus eidem Concilio Agathensi subscripsit, in quo dicitur Bigorritana, & *Iulianus* Bigorrensis Aurelianensi quarto.

ATVRVM apud Sidon. Apollin. libro 2. epistola 1. vulgò *Aire*, dicitur & Vico-Iulia apud Gregorium Turonensem lib. 9. hist. Francor. capite 7. *Marcellus* Episcopus de Ciuitate Vico-Iulij subscripsit eidem Concilio Agathensi, & *Rusticus* Matisconensi secundo.

LASCARA, quæ & Benarna dicitur in Concilijs & in dicta Notitia Galliæ, vulgò *Lescar*. *Galactorius* Lascarensis Episcopus subscripsit Concilio Agathensi, & *Sauinus* Matisconensi secundo.

OLERO, seu Ciuitas Elloronsium dicitur in eadem Notitia, vulgò *Oleron*. *Gratus* huius Episcopus subscripsit eidem Concilio Agathensi, & *Licerius* Parisiensi quarto.

CIVITAS AVSCIORVM eidem Notitiæ, vulgò *Ausch*. *Nicetius* Auscensis Episcopus subscripsit eidem Concilio Agathensi, & *Proculianus* Aurelianensi secundo.

AQVÆ in Nouempopulania eidem Notitiæ Galliæ sub Honorio, vulgò *Acs*. *Gratianus* Aquensis Episcopus subscripsit eidem Concilio Agathensi, & *Carterius* Aurelianensi quarto.

PROVINCIA NARBONENSIS, SEV NARBONENSIS PRIMA.

NARBO Strab. lib. 4. vulgò *Narbone*. Ad *Hilarium* Narbonensem Episcopum dirigitur Epistola 8. Zosimi Papæ anno circiter 417. & *Paulus* primus huius Episcopus dicitur apud Greg. Turon. lib. 1. hist. cap. 30.

TOLOSA Ptolem. lib. 2. cap. 10. vulgò *Tolose*. *Heractianus* huius Episcopus subscripsit Concilio Agathensi, & *Saturninus* primus Episcopus Tholosanus dicitur apud eundem Gregorium Turon. ibidem.